

# Entrevista S.E. Primeiru-Ministru Taur Matan Ruak nian ho Jornalista Sira Iha Ámbitu Enkontru Semanal ho Prezidente Repúblika, Lu Olo

*Palasiu Prezidente Nicolau Lobato, 5 Dezembru 2019*

**S.E. Primeiru-Ministru Taur Matan Ruak:** Ne'e enkontru semanal ho Sua Exelénsia Señór Prezidente Repúblika, fó informasaun ba Sua Exelénsia kona-ba; primeiru Orsamentu Jeral Estadu ne'ebé retira fali no ami prepara para iha tempu badak apresenta fila fali, segundu atu konvida Sua exelénsia atu partisipa serimónia dia 7 Dezembru 2019, ne'ebé sei hala'ó iha Jardim Heróis da Pátria-Metinaru hodi halót ita-nia saudozu sira ne'ebé fó nia vida ba ita-nia nasaun, terseiru ko'alia uitoan kona-ba seguransa, ne'ebé ha'u hetan informasaun hosi Gabinete Sua Exelénsia nian kona-ba problema (*disputa baliza suku*) iha Lelalai (Baucau no Uaibobo (Vikeke) iha problema uitoan iha ne'ebá no mós iha Baukau, ami haree oinsá mak ita-nia instituisaun PNTL bele ajuda para evita problema sira ne'e labele boot ka agrave, ne'e mak asuntu sira ne'ebé mak ko'alia.

**Jornalista: Sr. primeiru-Ministru, liga ba orsamentu, Governu nia hanoin reduz ba hira?**

**S.E. Primeiru-Ministru Taur Matan Ruak:** Primeiru, ha'u hakarak hateten katak diskusaun orsamentu foin dadauk ne'e di'ak no kapás. Governu iha senáriu rua de'it, ida foti fali orsamentu, ida obriga Parlamentu vota kontra. Se karik obriga Parlamentu vota kontra, signifika tinan oin ita funsiona na baze duodesimu, ne'e primeiru. Segundu e ké Governu monu, terseiru katak ne'e re-aranju situasaun polítika, ambiente polítika iha Parlamentu, entaun entre obriga Parlamentu vota kontra ho Governu foti. Governu hili mak foti, foti ne'e di'ak tanba saida? Primeiru, se ita-boot sira haree, normalmente Prezidente Repúblika mak apela ba prudénsia. Se ita-boot sira haree iha ha'u-nia tempu kuandu Prezidente da Repúblika iha ha'u-nia diskursu iha livru rua Primeiru Volume no segundu Volume, buat ne'ebé ha'u ko'alia hanesan Prezidente no buat ne'ebé ha'u halo hanesan Primeiru-Ministru la hanesan, i depois ha'u sai hosi Prezidente, ita nia Sua Exelénsia Prezidente agora mak nia sempre apela, uza osan kuidadu!

Maibé enkuantu konxiénsia ida ne'e Governu no Parlamentu seidauk toma konxiénsia para bele halo esforsu para halo prudénsia no gastu sira ho kuidadu. Ita labele halo mudansa. Entaun primeira vés Parlamentu asumi ida ne'e, entaun ha'u kontente loos para ita bele haree ba oin ne'e entre halai, la'ó lais no la'ó neineik, ita hili ida ne'ebé? Ha'u prefere ita la'ó neineik. Entaun mak ami depois de foti fali orsamentu, ha'u fó orientasaun ba ha'u-nia Ministru, liuliu agora Komisaun Interministerial ida mak lidera para haree orsamentu tinan oin nian, lidera hosi Sr. Ministru Estadu ba Prezidénsia Konsellu Ministru, Sr. Ágio Pereira, i ha'u nia orientasaun ba membru Governu hotu mak ida ne'e; primeiru, ko'a to'ó ita-nia kapasidade ne'e bele! Ne'e katak se Parlamentu nia ezelesaun to'ó 80% de'it entaun ko'a to'ó ida ne'e. se Fundu Infraestrutur nia iha kapasidade ezelesaun de'it 40%, restu ne'e ko'a hotu, se Primeiru-Ministru nian implementa de'it 60% ko'a tiha ne'ebé la ezelesaun.

Apezar de tinan-tinan dezde tinan hirak liu ba kotuk ukun-an to'ó agora, ko'alia kona-ba kapasidade ezelesaun, mas kapasidade ezelesaun ne'e nunca sai hanesan padraun ida para atu bele kontrola elaborasaun orsamentu, sekalar ne'e oportunidade ida para impoin, i ha'u iha hanoin katak iha tempu oin mai uza ida ne'e (taxa ezelesaun) sai padraun ida, katak sé mak la implementa nia orsamentu hotu, la fó osan.

Ora, soké ida ne'e iha implikasaun rua, primeiru mak ba programa Governu nian. Iha Programa Governu nian defende katak kreximentu ne'e tenke 7% ou acima de 7%, kontribui iha tinan lima governasaun lejizlatura ida ne'e ba 10% redusaun kiak, kontribui ba 60 mil empregu kada tinan. Agora ita atu lori saida mak halo ida ne'e. Mas uma vés ké Parlamentu decide lae, Parlamentu mós responsabiliza kona-ba ida ne'e.

Segundu jestaun ba espetativa povu nian, povu hakarak eletrisidade lalais, bee moos lalais, kuandu ita hatún osan, ne'e signífika karreta karik halai 60km/h agora ita tenke reduz ba 20km/h, Mas entaun responsabilidade ne'e sé nian? ha'u hanoín ne'e responsabilidade hotu-hotu nian, hahú hosi Parlamentu Nasionál ke povu mak hili, entaun aban bainrua povu dehan tenke halo lalais, halo lalais, Parlamentu labele obriga Governu halo lalais, maibé sira tenke esplika ba povu dehan katak ita tenke lao neineik, tanba karik ita halai lalais osan sei hotu. Ne'ebé, ha'u mós lembra fila fali ba membru Governu sira prinsípiu ne'ebé uluk ami iha ai-laran uza katak "*Iha tempu ne'ebé hahán barak han natón para kabun labele luan, iha tempu ne'ebé hahán la iha, han natón para buka moris de'it*". Ne'ebé agora ita komesa ko'a, i ha'u kontente loos ba ida ne'e.

**Sr. Primeiru-Ministru, item Sasán no Serbisu boot liu kompara ho item sira seluk, ne'e karik sei ko'a?**

**S.E. Primeiru-Ministru Taur Matan Ruak:** La'ós bens serviço. Ita-boot parese husu transferénsia públika karik. Tanba *bem serviços* la'ós boot liu, Transferénsia Públika mak boot liu. Agora iha diskusaun foin dadauk iha Parlamentu Nasionál, la iha tempu para ita ko'alia tanba saida mak boot? Alias Parlamentar sira-nia hakarak Governu foti lalais(retira), la'ós ba esplika tanba saida mak boot.

Mas ha'u bele aproveita para esplika uitoan tanba saida mak transferénsia boot. Porezemplu 93 milloíns ba veteranu no antigu kombatente sira, ne'e iha transferénsia públika, kuaze 93 milloíns ba Petróleu no mineral, kuaze 60 milloíns ba Ministériu Estatal, ne'e ko'alia kona-ba PNDS, no ko'alia kona-ba uma ba kbiit la'ek sira. Parlamentar sira dehan nusa mak la tau iha kapitál Dezenvolvimentu ba tau fali iha transferénsia públika? Ne'e iha razaun. Primeiru, ita atu kombat kiak no mal nutrisaun buat ida importante mak osan tenke ba família sira nia bolsu, agora osan ba família sira-nia bolsu ne'e ba hosi dala hira? Se ita haree didi'ak, ba hosi dalan tolu(3): ida mak ba hosi sira ne'ebé ita bolu apoiu sosiál, pensaun ba veteranu, terseira idade, bolsu da mae, ne'e ida. Ida seluk liu hosi empreza sira, ke ita loke konkursu iha kapitál dezenvolvimentu ba projetu sira, kompañia manán, fó serbisu balun ba ita-nia sidadaun sira no sira mós manán lukru balun. Ida seluk mak ba lansung (*direta*) ba iha sira-nia (*komunidade*) bolsu, ne'e mak hanesan PNDS, hanesan uma ba ema kbiit la'ek sira. Agora Governu dehan osan ba povu nia bolsu, mas Parlamentu dehan labele tenke ba hotu emprezáriu sira, entaun ita tuir ida ne'e. Forma mak la hanesan, dalan mak la hanesan maibé objetivu ida de'it kombat kiak no mukit, i osan tenke ba duni sírkula iha populasau nia leet. Entre ida ne'ebé direktamente ba povu liuhosi projetu komunitária no ida ne'ebé liu hosi Kapitál Dezenvolvimentu ka liuhosi emprezáriu sira, ida ne'ebé mak di'ak liu? Ha'u mak povu karik ida ne'ebé mai loos ami ne'e mak di'akliu tanba mai tomak, ida ne'ebé liuhosi emprezáriu ne'e nia han tiha mak fó uitoan de'it ba ami. Imi haree to'ok nia lójika.

**Jornalista : Sr. Primeiru-Ministru retira OJE 2020, nia impaktu iha ka lae ba ekonomia rai-laran?**

**S.E. Primeiru-Ministru Taur Matan Ruak:** Hanesan ohin ha'u dehan, iha impaktu rua. Ida, la'ós foti de'it, mas redusaun ne'e mak iha impaktu boot. Ita kuandu reduz ne'e iha buat rua; meta sira ne'ebé define iha programa sei la kumpri, Dezenvolvimentu invés lais, mas la'o neineik, porezemplu ita hakarak tinan tolu eletrisidade hotu, bee mos hotu, ita sei labele. Tanba ita ko'a osan, ita ko'a atividade, kuandu ko'a atividade, ko'a projetu sira, kuandu ko'a projetu, ko'a programa, ne'ebé la'ós dehan ita ko'a osan atividade la'o nafatin. Lae! Ne'e hanesan ita halo festa karik konvida bainaka rihun ida, mas tanba ita ko'a tiha osan, entaun tenke konvida de'it na'in atus lima, entaun nia implikasaun mak ida ne'e.

**Jornalista: Sr. Primeiru-Ministru, Bankada Apoiu Governu mak kritika osan montante boot. Karik ne'e la iha ona harmonia iha AMP nia laran?**

**S.E. Primeiru-Ministru Taur Matan Ruak:** Lae! Hanesan ohin ha'u dehan, ne'e pasu pozitivu ba iha prudénsia, kontrolu i ne'e primeira vés, alias ita-boot sira haree ha'u iha ne'ebá (PN), ha'u dehan, iha debate orsamentu hotu-hotu, normalmente Bankada sira ne'ebé apoiu Governu ne'e, nia apoiu Governu nian tomak, só opozisaun mak hatún ka ko'a, mas ne'e primeira vés iha istória própriu Partidu sira ne'ebé apoiu Governu sira mak hakarak ko'a. Ne'e pozitivu! Pozitivu tanba saida? Tanba hateten dehan ita la'o neineik, labele halai, tanba halai lalais ita nia osan bele hotu lalais, ne'ebé ne'e pasu pozitivu.

**Obrigadu barak!**